

Liku-liku Pembangunan Kepimpinan Wanita

Abstrak

Kertas kajian ini tertumpu kepada aspek teoritis dan empiris liku-liku pembangunan kepimpinan wanita, berdasarkan pengalaman tokoh pemimpin wanita ulung Fatimah Hashim (1924-2010). Fatimah Hashim pernah memegang beberapa jawatan politik, kerajaan dan badan bukan kerajaan iaitu Kaum Ibu UMNO (1956 -1972), Menteri Kebajikan Am (1969 – 1973) dan Yang Dipertua National Council of Women's Organizations (NCWO). Dalam hal ini, kemunculan kepimpinan wanita Fatimah Hashim dan keupayaan beliau untuk bertahan dalam sekitaran masyarakat konservatif dan patriarki menjadi suatu yang penting untuk dikaji. Apatah lagi, pada waktu itu, isu kekangan terhadap pembangunan kepimpinan wanita belum mendapat perhatian serius daripada pihak Kerajaan Malaysia seperti Dasar Wanita Negara dan Dasar Sekurang-kurangnya 30 Peratus Wanita di Peringkat Pembuat Keputusan. Di samping itu, Fatimah Hashim memimpin pada era sebelum berpengaruhnya organisasi antarabangsa seperti Pertubuhan Bangsa-bangsa Bersatu (PBB) yang menganjurkan program Dekad Wanita Antarabangsa (1975 – 1985) dan undang-undang antarabangsa, Convention on the Elimination of All Forms of Discrimination Against Women (CEDAW). Berdasarkan latar belakang ketiadaan mekanisme rasmi yang membela wanita itulah pembangunan kepimpinan wanita Fatimah Hashim tercetus dan berkembang. Oleh yang demikian, kertas kajian ini bertujuan untuk menjawab dan menjelaskan asas-asas yang berperanan mensosialisasikan kepimpinan Fatimah Hashim. Pertamanya, kertas kajian meninjau latar kehidupan Fatimah Hashim sebagai pengenalan kepada diri beliau. Keduanya, membincangkan aspek teori dan konsep berkaitan kepimpinan, terutamanya berkaitan liku-liku pembangunan kepimpinan wanita. Ketiga, mengupas bukti-bukti empirikal pengalaman kepimpinan Fatimah Hashim yang berkait rapat dengan isu pembangunan kepimpinan wanita. Oleh

yang demikian, berdasarkan penemuan kajian ini, pengkaji menganjurkan (i) pendidikan formal dan tidak formal, (ii) peranan lingkungan sosial dan (iii) konteks sejarah diambil kira bagi memahami dan menjelaskan pengalaman liku-liku pembangunan kepimpinan wanita Fatimah Hashim dan tokoh wanita lain yang setara pengalamannya dalam dunia kepimpinan.

Kata Kunci: (i) Fatimah Hashim, (ii) liku-liku pembangunan kepimpinan wanita, (iii) pendidikan formal dan tidak formal, (iv) lingkungan sosial dan (v) konteks sejarah